

VIA SAKRA ho LAUDATO SI'

Pilatos tesi lia atu mate

Dala ida tan Pilatos ko'alia ba sira, hodi buka soi Jezús. Maibé sira hakilar nafatin: "Hedi Nia ba krus! Hedi Nia ba krus!" Ba dala tolu nia dehan ba sira: "Nia halo aat sa? Ha'u la hetan sala ida atu oho Nia. Ne'e duni, ha'u sei kastigu Nia, hafoin husik Nia ba." Maibé sira litik, hodi husu ho lia maka'as atu hedi Nia ba krus. Sira nia lia maka'as liu tan ba dau-daun. Ne'e duni, Pilatos haraik buat ne'ebé sira husu; nia hasai ema ne'ebé dadur tan soran povu no oho ema, no saran Jezús ba sira tuir sira nia hakarak. *(Lk 23, 20-25)*

Meditasaun

Kondena ekonomia (Daniela Finamore, GCCM Divest-Invest & European Programs Coordinator)

Iha tentasaun forte ida iha ema ne'ebé dudu nia atu halai husi ninia responsabilidade sira. Kuaze koko atu la sente hilin sira nia todan, liuliu se refere ba ema seluk. Ema justu ne'ebé mate mós hanesan ne'e. pilato nia indiferénsia marka mós ita-nia tempu kona-ba krime sira no injustisa sira ne'ebé mosu husi ekonomia ida ne'ebé estraga uma komun no ita-nia maluk sira. Indiferénsia ida ne'e mai husi ta'uk atu la hanoin hanesan ema hotu, atu hamriik hamutuk ho ki'ik no kiak sira, tanba hamriik ho sira iha ninia folin, no folin karun. Nune'e, Pilato ho ninia silénsiu entrega ema loos ba ema seluk atu hedi ba krus. Ita simu bolun, husi Sinodu Amazonas nian, atu suporta kampañe kontra grupu sira ne'ebé provoka desastre ekolojiku iha Amazonas. Jezús husu mai ita aten-barani lialoos nian, atu kompromite an hodi la subar an, atu hamriik ho kiak sira hodi la ta'uk ema seluk nia juizu, atu promove justisa.

Ita medita no reza nonok momentu ruma molok kontinua ba estasaun seluk.

Jesus lori krus

Soldadu sira lori Nia ba pretoriu laran, hafoin, halibur tiha sira maluk hotu, sira tau ba Nia hena mean ida. Sira leu ai-tarak, tau ba Nia ulun. Tuir mai, sira kumprimenta Nia dehan, "Viva, liurai Judeu sira nian!" Sira baku Nia ulun ho fafulu ida, tafui ba Nia, no hakneak iha Nia oin hodi hanai Nia. Hasara tiha Nia, sira hasai hena mean, tau fali Nia hatais. Sira lori Nia husi neba atu iha krus. *(Mk 15, 16-20)*

Meditasaun

Kondenasaun sosiál (Benedict Ayodi OFM Capp, GCCM Program Manager – Africa)

Tesi tiha lia, ita-nia Na'i foti ninia krus no hahú ninia viajen to'o Golgota. Ema barak iha mundu tomak kona virus Corona: ida ne'e mak krus hanesan Jezús ninian. Jezús nia krus sai hun salvasaun nian no ita hateke ba krus ida ne'e iha momentu susar nian. Kristu manán, no ita la bele lakon esperansa, maibé metin iha fiar katak loron ida ita sei liu pandemia ida ne'e. ita reza atu Na'i bele haraik isin di'ak no konsolasaun ba ema moras hotu. Na'i Jezús, Ita lori krus atu bele hadi'ak relasaun entre Maromak no ema sira, ami harohan ba vitima sira Covid nian ne'ebé sente pandemia ida ne'e nia todan, hanesan uluk Ita sente krus nia todan. Ita Ita-nia terus, Na'i, haraik ba sira ita-nia protesau husi moras ida ne'e.

Ita medita no reza nonok momentu ruma molok kontinua ba estasaun seluk.

Jezús monu ba rai

Nia terus duni ita-nia terus; nia simu ita nia susar; no ita hanoin nia nu'udar ema ne'ebé Maromak fo kastigu, haterus ho susar oi-oin no hamoe. Maibé nia hetan terus tan ita-nia hahalok aat sira, ema hanehan tan ita-nia sala sira; kastigu ne'ebé hadame ita ho Maromak monu fali ba nia; tan nia kanek sira mak ita hetan fali isin diak. 6Ita hotu la'o sala dalan hanesan bibi sira;

ida-idak la'o tuir nia rasik nia dalan no Na'i tau ita hotu nia laran aat iha nia leten. (Is 53, 4-6)

Meditasaun

Ita-nia frajilidade hasoru kriasaun (Fabrizio Mola, LS Circle Piosasco)

Iha tempu ida ne'e ita sente sentimentu oinoin: ta'uk ba ema sira ne'ebé frajil liu, la seguro kona-ba futuro, agradece ba jestu ternura no solidariedade nian ne'ebé ita hasoru. Buat hotu troka lalais, susar atu hatene antes, halo ita sente katak la iha kbiit no kontrolu hasoru ambiente ne'ebé haleu ita. Tempu ida ne'e tulun ita atu purifika husi ita-nia halo an, ne'ebé halo ita fiar katak ita bele domina buat hotu. Oras ne'e ita experimenta katak ita kbiit laek, ita frajil liu iha kriasaun nian oin; ita husu ba Na'i atu ita bele buras iha haraik an atu sai ema ne'ebé respeita, tau matan no kontempla Maromak nia obra sira.

Ita medita no reza nonok momentu ruma molok continua ba estasaun seluk.

Jezús hasoru Ninia Inan

Besik Jezús nia krus hamriik nia inan, nia inan nia alin, katak Maria, Cleofas nia fen, ho tan Maria Magdalena. Haree tiha nia inan ho eskolante ne'ebé nia hadomi iha nia sorin, Jezús lia tun ba nia inan: "Na'in feto, ó-nia oan mak ida ne'e!" Hafoin Nia lia tun ba eskolante: "Ó-nia Inan mak ida ne'e!" No hori oras ne'ebá, eskolante ne'e simu nia iha nia uma. (Jo 19, 25-27)

Meditasaun

Rai, ita-nia inan (Daniela Finamore, GCCM Divest-Invest & European Programs Coordinator)

Surik ida sona borus Inan Maria nia fuan. Surik ida sona ita-nia inan rai nia isin bainhira ita estraga ai-laran sira, bainhira ita fakar venenu sira iha rai, iha mota no tasi laran, bainhira ita konsidera Kriasaun hanesan buat ruma ne'ebé ita-nian, la'ós prezente husi Maromak. Ita hakarak haburas sentimentu ingratidaun nian hasoru rai inan?

Iha momentu ida ne'e ita presiza hakbesik rai iha solidariedade, hodi sai ida de'it ho tanis no terus Maria nian, ho tanis rai no kiak sira nian no ita prepara ita-nia fuan atu ita-nia lalaok hatudu domina an sira nian, ne'ebé buka defende sira-nia inan no tau matan ba ninia kanek sira, iha isin no kلامar.

Ita medita no reza nonok momentu ruma molok continua ba estasaun seluk.

Simão Sireneu tulun Jezús

Wainhira sira lori Nia, sira kaer ema ida husi Sirene naran Simão, ne'ebé fila dau-daun husi to'os, hodi tau krus iha nia kbaas atu lori tuir Jezús. (Lk 23, 26)

Meditasaun

Serbí maluk sira (Piera Savino, LS Circle Roma Trastevere)

Iha tempu ida ne'e, ema barak tulun malu atu lori sira-nia krus. Ita reza ba sira hotu. Ita haree mós katak ita-nia rutina la iha ona, no dala ruma ita preokupa ba ita-nia bem-estar ekonomiku rasik, hodi la hanoin katak iha ema barak ne'ebé moris kiak liu fali ita. Se mak tulun sira atu lori sira-nia krus, tuir ida-idak nia talentu? "Ita labele bandu artista ida atu hato'o ninia kapasidade kriativa, nune'e mós labele tahan sé mak iha don espesiál ba progresu sientífiku no teknolójiku, ne'ebé Maromak haraik atu serbí ema seluk." (LS 131).

Ita medita no reza nonok momentu ruma molok continua ba estasaun seluk.

Veronika laran sadia ba Jezús

Se mak fiar buat ne'ebé ita foin rona no ba se mak hatudu Na'i nia liman? Nia sai boot hanesan ai oan ida iha nia oin no hanesan abut iha rai maran. Nia forma la furak atu ita hateke ba nia; la kmanek atu ita hakarak nia. Ema despresa nia, mukit liu iha ema hot-hotu nia leet; ema terus na'in no toman atu terus. Ita ses ita-nia oin iha nia oin; ema hakribit, ita la hanoin nia. Nia terus duni ita-nia terus; nia simu ita-nia susar; no ita hanoin nia nu'udar ema ne'ebé Maromak fo kastigu, haterus ho susar oi-oin no hamoe. *(Is 53,1-4)*

Meditasaun

“Rona” kriasaun nia ran (Fabrizio Mola, LS Circle Piosasco)

Loron hirak ne'e, ema hotu hanoin saida mak tenke halo atu manán pandemia ida ne'e no ema hotu buka informasaun, lee notisia, experimenta modu foun atu servisu, komunika no relasiona ba malu. Ita konxiente katak situasaun ida ne'e mak grave, maibé ita konxiente mós katak, iha nasaun barak, pandemia mak problema ida hamutuk ho problema boot seluk barak. Ita bele “sente” kriasaun ne'ebé sofre, no ita haree kaur malu ran husi ema ne'ebé mate tan Covid, tan funu, tan hamlaha. Ran ida ne'e tenke tulun ita atu komprende katak buat hotu liga ba malu no la iha terus ida ka emerjénsia ida ne'ebé bele dook husi ita-nia atensaun no kompaxaun.

Ita medita no reza nonok momentu ruma molok kontinua ba estasaun seluk.

Jezús monu fali ba rai

Jezús dehan: “Aman, perdua sira, basa sira la hatene buat ne'ebé sira halo.” Tuir mai sira dada sorte atu fahe ba malu Jezús nia unuk sira. *(Lk 23, 34)*

Meditasaun

Ita-nia frajilidade hasoru maluk sira (Paolo Perri, GCCM assistant controller)

Ita ne'ebé halai tun sae, buka sasán, foti buat ne'ebé ita presiza hodi haluha ema seluk nia presiza, nia ta'uk no ninia direitu sira, ita hanesan ema lubun boot ne'ebé hakilar hasoru Jezús ne'ebé terus nonok. Loloos, ita monu iha rai rahun hanesan Jezús, Kruz visiu sira nian hanehan ita, maibé ita bele hamriik fali, ita bele komprende katak la'ós individualizmu ka egoizmu mak dalan ne'ebé ita tenke hala'o, maibé dalan ne'ebé Maromak domin nian mak marka, dalan domin ba maluk sira.

Ita medita no reza nonok momentu ruma molok kontinua ba estasaun seluk.

Jezús hasoru feto sira

Ema lubun boot tuir Nia, no mós feto sira ne'ebé tanis hodi hanoin tebes Nia. Maibé Jezús fila oin ba sira, dehan: “Jerusalem nia oan feto sira, imi keta tanis tanba Ha'u; di'ak liu tanis tan imi an rasik no tan imi-nia oan sira. Basa loron sei to'o mai wainhira ema sei dehan: ‘Rahun di'ak ba feto sira ne'ebé oan la iha, knotak sira ne'ebé la ko'us, hirus matan sira ne'ebé la fó susuben.’ Iha loron ne'ebá sira sei dehan ba foho aas sira: ‘Imi monu mai ami leten!’ no ba foho ki'ik sira: ‘Imi taka tiha ami!’ *(Lk 23, 27-30)*

Knanauk:

Jezús monu ba rai dala ida tan

Di'ak ba ema ne'ebé tula naha hahú nia sei foin-sa'e. Halo nia tur nonok de'it bainhira Na'i tau naha ba nia; halo nia tau niaibun iha rai rahun: keta sei iha esperansa. Nia saran nia hasan ba ema ne'ebé hakanek nia to'o hasara nia, basa Na'i la hewai nia ba nafatin. Biar nia fó kastigu, nia sei hanoin sadi'a ho domin boot. *(Lam 3, 27-32)*

Meditasaun

Ita-nia frajilidade hasoru Maromak (Piera Savino, LS Circle Roma Trastevere)

Ita-nia moris iha serteza uitoan de'it. Iha tinan rua ne'e ita konxiente kona-ba buat ne'e: ita-nia sosiedade, ita-nia ekonomia, maibé mós ita-nia comunidade la hatene halo saida loos, no ita deskobre fali ita-nia frajilidade hasoru Maromak. Dala ruma ita lakon serteza kona-ba ninia prezensa silensioza, maibé serteza ida ne'e fó sentidu ba ita-nia moris. Ita fiar katak ita bele hamriik fali bainhira ita monu no Jezús besik nafatin iha tempus usar nian.

Ita medita no reza nonok momentu ruma molok kontinua ba estasaun seluk.

Ema	kolu	Jezús	nia	faru
-----	------	-------	-----	------

Hedi tiha Jezús ba krus, soldadu sira hola nia unuk hodi fahe ba sira na'in hat. no mós nia hatais. Hatais ne'e la suku ida, ema soru naruk de'it. Tan ne'e sira dehan ba malu : "Ita keta les hatais ne'e: Ita koko de'it sorte atu haree nia monu los ba se." Nune'e sai tuir loos lia eskrituura ne'ebé dehan: "Sira fahe Ha'u-nia hena ba malu, sira koko sorte ba Ha'u-nia hatais." Soldadu sira halo duni nune'e. *(Gv 19, 23-24)*

Meditasaun

Sinodalidade (Cecilia Dall'Oglio, GCCM European Programs Manager)

Na'i, ita-nia isin, Ita-nia Kreda mak molik. Ami mós, ne'ebé Ita bolu atu moris iha comunidade (iha ne'ebé Ita gosta horik ho ami), dala ruma ami besik malu de'it, iha Ita-nia isin, ami la iha domin no armonia, ami la hatene malu no la reza ba malu. Ami la'ós hanesan S. Francisco ne'ebé hasai ninia hatais: ami riku ho ami-nia projetu sira, eventu, karizma no misaun sira, ami hatene dehan de'it: "uluk kedas halo hanesan ne'e". ami seidauk hatene haksolok bainhira Espíritu mosu iha ema seluk, bainhira maluk ida halo di'ak liu fali ami ba kiak sira no ba ita-nia rai. Buat hotu liga malu, maibé ami seidauk! Ami presiza servisu tan atu bele moris iha uma komun, atu bele organiza ho armonia, atu bele hananu hamutuk ba Ita.

Ita medita no reza nonok momentu ruma molok kontinua ba estasaun seluk.

Ema hedi ho besi-kusan Jezús iha krus

Bainhira sira to'o fatin naran Kalvariu, sira hedi Nia ba krus ho ema aat sira ne'e, ida iha sorin kuana, ida seluk iha sorin karuk. Jezús dehan: "Aman, perdua sira, basá sira la hatene buat ne'ebé sira halo." Tuir mai sira dada sorte atu fahe ba malu Jezús nia unuk sira. Ema sira hamriik hodi hateke hela. Na'i ulun sira hamoe Nia, dehan: "Nia ne'ebé soi ema seluk, soi to'ok nia an; ema ne'e Maromak nia Messias karik." Soldadu sira mos hamoe Nia, hodi hakbesik atu fo ba Nia tua sin, dehan: "Ó Judeu sira nia liurai karik, soi ó-nia an ba!" Iha nia ulun leten ema hakerek ho lia gregu, latin no ebreu: "Ne'e mak Judeu sira nia liurai." Ema aat sira ida, ne'ebé tara hela, ko'alia aat Nia, dehan: "Ó mak Messias karik, soi o an rasik, no mos ami!" Maibé ida

seluk haksi'ak nia, dehan: "Ó mos hetan terus ne'e, ó la tauk Maromak? Tuir duni justisa mak ita hetan kastigu, tan ita-nia hahalok aat; maibé ema ne'e la halo aat ida." Hafoin nia dehan ba Jezús: "Na'i, hanoin ha'u wainhira Ita to'o Ita nia reinu." Jezús hatán ba nia: "Tebes, Ha'u dehan ba ó: ohin kedas ó sei hamutuk ho Ha'u iha lalehan." (Lk 23, 33-43)

Meditasaun

Kiak sira nia hakilar (Benedict Ayodi OFM Capp, GCCM Program Manager – Africa)

Hanesan pregu ida ne'ebé sona ema nia isin, nune'e Jezús sofre ninia agonia. Nu'udar kapusino sira ami servisu iha Nairobi nia bairu kiak sira, ami haree ema ne'ebé moris kiak rabat rai, la iha aihan, la iha bee, la iha aimoruk, la iha uma. No oras ne'e, ho Covid, iha ne'ebé sira bele halo karantine? Oinsá bele sosa aimoruk ne'ebé presiza? Oinsá bele servisu husi uma se sira la iha servisu? Mundu tomak hateke ba sira, maibé la preokupa, kiak sira terus no fahe ho nonok Kristu nia terus, tan ema la fó aihan, la fó domin, la hatudu ternura ba sira.

Ita medita no reza nonok momentu ruma molok kontinua ba estasaun seluk.

Jezús mate

Besik ona loron fahe rua, nakukun taka rai tomak to'o suku tolu loraik, tan loro matan lakon tiha. Hena templu nian nakles fahe rua iha klaran, no Jezús hakilar ho lia maka'as: "Aman, iha Ita liman Ha'u saran Ha'u-nia klamar!" Dehan tiha ne'e, Nia iis kotu. (Lk 23, 44-46)

Meditasaun

Ita-nia relasaun ho Maromak (Antonio Caschetto, GCCM Laudato Si Program Coordinator - Assisi)

Iha Jezús nia hakilar ita komprende kalvariu nia drama: la'ós de'it inan ida nia terus, la'ós dizilusaun kona-ba apostulu sira, la'ós moras no mate; drama boot liu mak lakon relasaun ho Maromak. Ita-nia moris oinsá karik se la iha roman husi relasaun loos ho ita-nia Kriadór? Iha momentu ne'ebé ita la bele celebra, oinsá ita-nia relasaun ho Maromak? Hakilar ne'ebé Jezús hasae husi krus mak ema ida-idak nia hakilar bainhira terus hanehan nia.

(Ita nonok momentu ruma hodi hanoin ba ema hotu ne'ebé mate tan Covid, funu no hamlaha)

Ita medita no reza nonok momentu ruma molok kontinua ba estasaun seluk.

Ema hatun Jezús husi krus

Iha na'iulun ida, naran Jose, ema laran di'ak ida husi rai Arimateia, sidade ida iha Judeia. Nia membru ida konseliu nian, nia la tuir nia maluk sira nia hakarak no hahalok sira, maibé hein dau-daun Maromak nia reinu. Nia ba ko'alia ho Pilatos, hodi husu Jezús nia isin mate. Hatun tiha husi krus, nia falun tiha Nia ho hena mutin, hodi tau Nia iha rate foun ida, iha ne'ebé seidauk hakoi ema ida. (Lk 23, 50-53)

Meditasaun

Ita-nia relasaun ho maluk sira (Domenica Reyes, GCCM Communications and Programs Coordinator, Co-chair LaudatoSiGeneration.org)

Hanesan José, ita tenke sai solidariu ho maluk sira. Ita presiza moris iha armonia, ho ema hotu, la'ós de'it ho maun . alin feton sira, maibé mós ho kriatura tomak. Maromak husu mai ita atu tau matan ba uma komun, la'ós ba ita-nia an rasik de'it, maibé mós ba jerasaun ne'ebé sei mai. Krize klimatika no pandemika ne'ebé ataka ita dezafia ita atu nakfilak ita-nia moris, tanba krize ne'e afeta liuliu sira ne'ebé vulneravel. Ita presiza tau matan ba ita-nia uma komun nu'udar sinál domin nian ba sira ne'ebé vulneravel liu.

Ita medita no reza nonok momentu ruma molok kontinua ba estasaun seluk.

Ema hakoi Jezús nia isin

Ne'e loron atu hadia sasan, no loron Sabadu atu hahú ona. Feto sira ne'ebé tuir Nia husi Galileia ba hamutuk ho Jose. Wainhira sira fila fali ona, sira hadia mina morin. Iha Sabadu sira la kaer serbísu tuir lisan. *(Lk 23, 54-56)*

Meditasaun

Ita-nia relasaun ho kriaun (Paolo Perri, GCCM assistant controller)

“Ita la bele haluha katak atu ekosistema sira bele funsiona, presiza mós tutukeu, ular, lalar, samea no mikroorganizmu barak. Iha spesie ruma, ne'ebé bainbain ladún fó importánsia, ne'ebé iha papel fundamentál atu halo estabil ekilibriu iha fatin ida” (Querida Amazonia, 49). Oras ne'e, virus ki'ik oan ida kontinua atrapalha ema nia moris, hahalok loronloron nian, buat hotu ne'ebé ita toman ona. Ita presiza konxiente kona-ba buat ne'e, maibé mós prezisa foti kbiit husi tempu susar ne'e atu, hanesan Kristu Moris Hi'as, ita bele sai husi “rate” ida ne'e, no loke an ba roman no domin.

Ita medita no reza nonok momentu ruma molok kontinua ba estasaun seluk.